

Մայրը բամփեց դատեր գլխին, փոքրիկ թարգմանը լաց ելաւ, եւ ձգելով իր անախորժ պաշտօնը, դուրս փախաւ:

– Ես հասկացայ, քոյրս, – ասեցի Մարգարիտին:

Նա անշարժ եւ լուռ մնաց իր տեղում, սպասելով իմ վերջին խօսքին:

– Դու ուզում ես Մարօի հետ ուխտ գնալ, այդպէս չէ՞:

Նա գլուխը շարժեց հաւանական եղանակով:

– Ինչո՞ւ Հասօն չէ ուղարկում եւ քեզ:

Նա այժմ շարժեց ուսերը, որ նշանակում էր, թէ ինքն էլ չգիտէ:

– Դու ցանկանում ես, որ ես խնդրե՞մ Հասօից:

Նա գլուխ տոեց, իբր թէ շնորհակալ կը լինի:

Նոյն միջոցին ներս մտաւ Մարօն: Նրա երեսի վրայ երեւեցաւ զարմացման նման մի բան:

– Դո՞ւ այստեղ ինչ ես շինում, – հարցրուց Մարգարիտից:

Հարսը ձեռքով ցոյց անեց ճրագը, իբր թէ ճրագն էր բերել:

– Մարգարիտն ուզում է գալ մեզ հետ, – ասացի ես Մարօին:

– Թող գայ, անելի լաւ: Բայց Հասօն ի՞նչ կասէ:

– Ես Հասօից կը խնդրեմ:

Մարօն ուրախացաւ, եւ դառնալով դեպի Մարգարիտը, ձեռքը տարաւ դեպի նրա քօղը, բարձրացնելով ասաց.

– Ումի՞ց ես երեսդ ծածկում, Ֆարիատի՞ց, ինչո՞ւ չես խօսում, քոյրն եղբօր հետ չի՞ խօսի: Ֆարիատը ինչպէս իմ, այնպէս էլ քո եղբայրն է:

Մարգարիտը թէեւ շուտով քօղը քաշեց երեսին, բայց ես կարողացայ տեսնել նրա դէմքը. նա նմանում էր մի խամրած, դալկացած ծաղկի, որ երկար պահուել էր ծածկոցի տակ:

Մարօն կրկին ձեռքը տարաւ դեպի նրա քօղը: Մարգարիտը չկարողանալով դիմանալ նրա հանաքներին, մի բան ասաց Մարօի ականջին եւ դուրս վազեց: Մարօն սկսեց ծիծաղել:

– Ինչ ասաց նա:

– Ասաց՝ «մեղք չէ՞, որ դու ասում ես՝ Ֆարիատն իմ եղբայրն է»:

– Ինչո՞ւ է մեղք:

– Տղան եւ աղջիկը երբ մեկմեկու հետ քոյր ու եղբայր են դառնում, նրանք էլ...